



Cuir, ils 27 da favrer 2024

Communicaziun a las medias

Il project «In regal per mintga uffant novnaschè» cuntinuescha

«In regal per mintga uffant novnaschè» – in project da la Lia Rumantscha en collavuraziun cun sias uniuns affiliadas regionalas e las vischnancas rumantschas e bilinguas – è vegnì realisà l'onn 2022 sco project da pilot en il Grischun Central e l'onn passà en tut las regions rumantschas dal Grischun. Suenter fitg buns resuns cuntinuescha il project l'onn 2024, uschia ch'ils uffants novnaschids da las vischnancas rumantschas e bilinguas survegnan era quest onn in «regal rumantsch».

Igl è da grond'impurtanza ch'ils uffants vegnian gia da giuvens en contact cun il rumantsch e sensibilisads per quel. Uschia ha la Lia Rumantscha, en collavuraziun cun l'Uniun Rumantscha Grischun Central e las vischnancas rumantschas e bilinguas dal Grischun Central, lantschà l'onn 2022 il project da pilot «In regal per mintga uffant novnaschè». En il rom da quel project è vegnì surdà l'onn 2022 als uffants novnaschids en vischnancas rumantschas u bilinguas dal Grischun Central in regal rumantsch. Quel pac ha cuntegnì in cudesch rumantsch sutsilvan ubain surmiran, ina charta da gratulaziun per ils geniturs e fegliets cun infurmaziuns davart diversas purschidas per famiglias da la Lia Rumantscha.

Carmen Caspar, manadra Regions e responsabla per il project, di davart la motivaziun: «Ils uffants èn noss futur e sch'il rumantsch vegn dà vinavant ad els, viva nossa lingua. Uschia èsi da grond'impurtanza ch'ils uffants ed ils geniturs vegnian gia baud en contact cun il rumantsch e sensibilisads per quel. Cudeschs èn il med perfetg per far ils emprims pass en il mund dals bustabs e plets, da la lingua e d'istorgias.»

Suenter fitg buns resuns davart il project da pilot è quel vegnì extendì l'onn 2023 sin l'entir territori rumantsch en il Grischun e vegn manà vinavant era quest onn. Quai en collavuraziun cun l'Uniun dals Grischs, l'Uniun Rumantscha Grischun Central, la Surselva Romontscha e las vischnancas rumantschas e bilinguas. Uschia che tut ils uffants novnaschids da las vischnancas rumantschas e bilinguas pon sa legrar era l'onn 2024 sin in «regal rumantsch».